

每週經課朗誦經文(巴克禮漢羅/教羅)2013/12/01

共同經課 - 1 以賽亞書二章一節~五節

1 A-mô-su ê kiáⁿ 以賽亞所得 tiòh 論猶大 kap 耶路撒冷 ê 默示。2 到 hiah-ê 日 ê 了後，耶和華殿 ê 山 beh 建立 tī chiah-ê 山 ê 頂面，poâⁿ 過 lóng 總 ê 山嶺；萬國 lóng beh 來歸伊。3 有 choē-choē 國 ê 百姓 beh 去，講，來 ah，咱上耶和華 ê 山，到雅各 ê 上帝 ê 殿；伊 beh 用伊 ê 道路教示咱，咱亦 beh 行伊 ê 路；因為律法 beh tùi 錫安出，耶和華 ê 話 beh tùi 耶路撒冷傳播。4 伊 beh tī 列國中來審判，為 tiòh choē-choē 百姓來解決；in beh 將 in ê 刀 phah 做犁頭，將 in ê 鎗 phah 做鐮 á；chit 國無 kiáh 刀攻擊 hit 國，in 亦無 koh 學習交戰。5 雅各 ê 家 ah，tiòh 來，咱 tiòh tī 耶和華 ê 光明中來行。

共同經課 - 2 詩篇一百二十二篇

1 上崎 á ê 詩；大衛所做 ê。1) 人對我講，咱來去耶和華 ê 厝，我就歡喜。2 耶路撒冷 ah，阮 ê 腳 khiā tī 你 ê 門內。3 耶路撒冷受起造，親像連絡整齊 ê 城。4 Chiah-ê 支派，就是耶和華 ê 支派，照以色列定 tiòh ê 例，上去 hia beh o-ló 耶和華 ê 名。5 因為 tī-hia 設立審判 ê 寶座，就是大衛 ke ê 寶座。6 Tiòh 替耶路撒冷求平安；見若疼你 ê 人的確安樂。7 願你城內平安，願你 ê 宮內安樂。8 因為我 ê 兄弟 kap 同伴 ê 緣故，我 beh 講，願平安 tī 你 ê 內面。9 因為耶和華咱 ê 上帝 ê 厝 ê 緣故，我 beh 替你求福氣。

共同經課 - 3 羅馬書十三章十一節~十四節

11 Án-ni-siⁿ 知 chit-ê 時候就是 lín 已經 tiòh 睏醒 ê 時；因為咱得 tiòh 救，比起頭信 ê 時 khah 近。12 暝 beh 過，日時近 lah；所以咱 tiòh thng 去烏暗 ê 所行，來穿光明 ê 戰甲。13 所行 tiòh 端正，親像 tī 日時；莫得放縱酒醉，莫得好色邪淫，莫得相爭怨妒。14 Tiòh 穿主耶穌基督，莫得為 tiòh 肉體圖謀，致到 thàn 私慾。

共同經課 - 4 馬太福音二十四章三十六節~四十四節

36 若是論 hit 日、hit 時，人 m̄知，天使也 m̄知，Kiáⁿ 也 m̄知，獨獨父知 nā-tiāⁿ。37 Koh 親像挪亞 ê 日，人子 ê koh 來也 beh án-ni。38 因為大水 ê 事先 hiah-ê 日，人 teh lim 食、嫁娶，到挪亞入大船 ê 日，39 in 竟然 m̄知，到大水到，一盡滅 in，人子 ê koh 來也 beh án-ni。40 Hit 時 beh 有兩人 tī 園裡，一個取去，一個放 teh。41 兩個婦人人挨磨，一個取去，一個放 teh。42 所以 tiòh tiuⁿ-tī，因為 lín m̄知 lín ê 主甚麼日 beh 來。43 家主若知賊甚麼更 beh 到，伊就 tiuⁿ-tī，無容允人 iah 孔伊 ê 厝，這是 lín 所知。44 所以 lín 亦 tiòh 備辦便；因為 lín 無 phah 算 ê 時，人子來 lah。